



Չարմանազանը վերածուեցաւ Չարցանց 2.0-ի

Չարմանազան՝ հայերէն լեզուի մանկավարժական ամառնային ծրագիրը տեղի պիտի չունենայ այս տարի, ինչպէս որ նախատեսուած էր, պատկածել ժահիրին պատճառաւ համաճարակին հետեւանքով:

Բայց չի նշանակեր որ ամբողջովին ջնջուեցաւ: Չարմանազանը ձեւ ու կերպարանք փոխեց, դարձաւ “Չարցանց 2.0”:

Չարցանց 2.0-ն Չարմանազանին տեղը պիտի չգրաւէ անշուշտ: Պիտի ստեղծէ առցանց տարածք մը, որուն սահմաններէն ներս մասնակիցները ամէն օր պիտի հաղորդակցին, պիտի փոխանակեն, մնալով ամէն մէկը իր ամէնօրեայ շրջանակին մէջ, ապահով ու պատասպարուած:

“Չարմանազան”ին “Չար”ը փոխ առնելով եւ զայն “ցանց”ին կապելով (որ կը համապատասխանէ անգլերէն web-ին), Չարցանց 2.0-ն կը միախառնէ Չարմանազանի ոգին եւ 2020 տարւոյն մասնաւոր պարագաները: Չարցանց 2.0 նոր “ծրագրաւորում”ի մը արդիւնքը պիտի ըլլայ, որուն միջոցաւ մասնակիցները պիտի խաղան, պիտի զուարճանան, պիտի սորվին, պիտի փոխանակեն, այս ամբողջը՝ արեւմտահայերէն, արտադասարանային մթնոլորտի մը մէջ, լիովին օգտուելով հաղորդակցութեան նորագոյն արհեստագիտական միջոցներէն, իր նմանը չունեցող առցանց տեսադաշտի մը հորիզոնէն ներս:

Ճիշդ ինչպէս *Չարմանազանի* պարագային, Չարցանց 2.0-ի կազմակերպիչն է Հազար ու մէկ աշխարհ ընկերակցութիւնը, Գալուստ Կիւլպենկեան Հիմնարկութեան հետ սերտ գործակցութեամբ: Տեղի պիտի ունենայ ուրեմն առցանց, 18-էն 24 տարեկաններուն համար՝ Յուլիս 9-էն մինչեւ Օգոստոս 8, իսկ 10-էն 17 տարեկաններուն համար՝ Յուլիս 12 մինչեւ Օգոստոս 7: Մասնակիցները պիտի ըլլան արդէն իսկ Չարմանազան 2020-ին արձանագրուածները, ընդամենը 67 հոգի, որոնց պէտք է աւելցնել ուղեկիցները եւ կազմակերպիչ կորիզին անդամները: Այդ 67 մասնակիցները հետեւեալ երկիրները կ'ապրին. Արժանթին, Գանատա, Թուրքիա, Լիբանան,



Հայաստան, Մեծն Բրիտանիա, Միացեալ Նահանգներ, Յունաստան, Պելճիքա, Փորթուկալ եւ Ֆրանսա:

Աշխատանցներու կարգին առաջարկուած են՝ երաժշտութիւն, ստեղծագործական առումով գիր ու գրականութիւն, ընթերցում, գծագրութիւն, նկարչութիւն, ձեռային աշխատանք, խոհարարութիւն, ձայնասփիւռի յայտագիրի մը եւ թերթի մը պատրաստութիւն, ինչպէս նաեւ զանազան նիւթերու շուրջ վիճաբանութիւններ: Պատահին առջեւ ներկայութենէն անդին զբաղումները մասնաւորապէս պիտի քաջալերուին ու հրահրուին:

Չարցանց 2.0-ն իր նմանը չունեցած եւ չունեցող փորձառութիւն մը պիտի հանդիսանայ: Մասնակիցներուն առիթը պիտի ընծայէ իրենց աշխարհագրական տարբերութիւններուն անդրադառնալու եւ հաղորդակցութեան ու ստեղծագործութեան նոր ու յառաջադէմ ձեւեր զարգացնելու, այս ամբողջը՝ հայերէն լեզուով, թուային խողովակներու ընդմէջէն: Այսպէսով՝ պիտի համախմբէ, բայց հեռուէն:

[Կարելի է այստեղ դիտել տեսերիզը:](#)

Դժբախտաբար, Սփիւռքի մէջ գործող հայերէնի ուսուցիչներուն ուղղուած խտացեալ յայտագիրը, որ տեղի կ'ունենար Չարմանազանին հետ զուգահեռաբար, Փարիզի Արեւելեան Լեզուներու եւ Զաղաքակրթութիւններու Ինստիտուտին (Ինստիտուտին) հետ գործակցութեամբ, այս տարի ջնջուեցաւ: Այդ յայտագիրը հիմնուած է ուսուցիչներուն եւ Չարմանազան ճամբարի մասնակիցներուն միջեւ եռանդուն փոխներգործութեան մը վրայ: Հասկնալի է, որ այդ փոխներգործութեան պայմանները կարելի պիտի չըլլար վերստեղծել առցանց: